

# La baselgia evangelica grischuna s'occupa da la digitalisaziun

Franz Rüegg è vegnì tschernì stersas a Cuira sco nov parsura dal cussegl grond evangelic

■ (mc) «Google sco Deus?» Quai è stà il titel da referat ch'il sociofisicher e professer per «Computational Social Science» Dirk Helbing da la Scola politecnica ETH da Turig ha tegnì stersas a la dieta annuala dal cussegl grond evangelic a Cuira. «Cun in zichel cletg daventain nus perditga d'in nov temp», ha pretendì Dirk Helbing en l'introducziun da ses referat. Premissa saja dentant in cumbat per libertad, democrazia, intuiziun e charezza. En ses referat ha el discurre davart ils effects da la digitalisaziun e da l'intelligenza artificiala. «Nus tuts vegnin 'geprofiled e gettagged' e manipulads senza s'accorscher», ha avertì il referent. Las consequenzas da la digitalisaziun per nossa societad vegnian sutschazegiadas da blers. Helbing ha avertì il preschents d'in «totalitarissem tecnologic». A moda directa, efficienta e curaschusa ha el nizzegià la terminologia macabra da l'apocalipsa ed el ha avertì dal ristg da l'intelligenza artificiala per la de-

mocrazia. Ils dretgs umans e la dignitad umana stoppian vegnir scuvertts da nov. «Nus sa chattain en in process d'emprender cuntinuant», di Helbing «e nus chapin questa tecnologia mo pass per pass.»

## Nova legislatura ed elecziuns

Pli simplas da suandar e liquidar èn stadas las tractandas statutarias ch'han stuì vegnir liquidadas en la dieta d'atun dal cussegl grond evangelic. Sco emprima tractanda figuravan las elecziuns per la proxima perioda da legislatura 2018–2022. Franz Rüegg d'Arosa è vegnì tschernì sco nov parsura e successur da deputà Walter Grass. Emprima vicepresidente daventa la deputada Martha Widmer-Spreiter da Cuira, segund vice-president daventa Andri Poo da Filisur. Da nov en il directori entran deputada Heidi Clalüna (Segl en E.) e la plevonessa Silke Manks da Claustra. Da la cumissiun da gestiun fan part Robert Heinz (Evras),

plevon Stephan Bösiger (S. Maria/Müstair), plevonessa Ursula Müller-Weigl (Arosa), deputà Maurizio Miche (Castasegna) e Rico Stiffler (Tavau). Da la cumissiun da recurs fan part Peter Andri-Vital (Zuoz), la giurista Nina Tinner (Roten), Romano Kunz da Cuira e sco commember substitut Andri Mengiardi.

## Avvertì d'avair quità da las finanzas

Il preschents han approvà il preventiv 2019 da la cassa chantunala evangelica che quinta tar expensas da 10,7 milliuns cun in deficit da 104 000 francs. En medem mument vegnan las reservas s'augmentadas l'auter onn a chaschunar in deficit da 104 000 francs. Dal reminent èn era reservas da 600 000 francs vegnidass dissolvidas. En num da la cumissiun da gestiun ha recumandà Robert Heinz dad esser vinavant spargnus e d'avair vinavant quità da las finanzas. Il cassier Eugen Caduff ha constatà ch'i saja temp da levar

e da guardar cun egls averts sin la realitad. Las reservas da la baselgia reformada per edifizis sacralis muntian anc a 3,7 milliuns, las reservas per las pleivs da gulivaziun anc 2,8 milliuns.

## Nova constituziun

Medemamain approvà han las delegadas ed ils delegads il sboz da la Cuminanza evangelica svizra. Sco quai che la delegada Miriam Neubert ha pudì infurmar duai la cuminanza svizra vegnir numnada da nov «Baselgia evangelica-reformada da la Svizra».

La direcziun da la baselgia evangelica reformada vegn a vegnir structurada da nov cun installar ina sinoda, il cussegl ed il presidi. Plinavant vegnan cuminanzas cun bleras commembras e blers commembers ad obtegnair dapli paisa. La decisiun finala davart quella fatschenta vegn a vegnir pigliada ils 18 da december a Berna en il rom d'ina sentupada da las delegadas e dals delegads a Berna.